

# एस्तेर

## महारानी वसती क जरिये राजा क आग्या क उल्लंघन

**1** इ ओन दिनन क बात अहइ जब छयर्स नाउँ क राजा राज् किया करत रहा। भारत स लइके कूस क एक सौ सताईस प्रान्तन पइ ओनकर राज् रहा। **2**महाराजा छयर्स, सूसन नाउँ क नगरी, जउन राजधानी भवा करत रही, मैं अपने सिंहासन स सासन चलावा करत रहा।

**3**अपने सासन क तीसरे बरिस मैं, छयर्स अपने अधिकारियन अउ मुखिया लोगन बरे एक भोज क प्रबंध किहेस। फारस अउ मादै क फउज क मुखियन अउ दूसर महत्वपूर्ण मुखियन अउ प्रान्तीय अधिकारियन उ भोज मैं मौजूद रहेन। **4**इ भोज एक सौ अस्सी दिन तलक चला। इ समइ क दौरान, महाराजा छयर्स अपने राज् क महान सम्पत्ति अउ आपनी महानता क भव्य सुन्नरता देखावत रहा। **5**एकरे पाछे जब एक सौ अस्सी दिन क इ भोज समाप्त भवा, तउ महाराजा छयर्स एक ठु अउर भोज दिहेस जेहमाँ सूसा क जिला महल क सबहिँ लोगन साथ ही महत्वपूर्ण अउ बे-महत्वपूर्ण लोगन क बोलवा गवा रहा। इ भोज सात दिन तलक चला। इ भोज क आयोजन महल क भतीरी बगीचे मैं कीन्ह गवा रहा। **6**भोज क जगह सफेद अउ नीले रंग क मलमल सूती कपड़न स सजावा ग रहा। इ बैंगनी रंग की डोरियन स पकड़ा रहा। उ संगमर क खम्भन क बीच मैं चाँदी क छड़न दुआरा लटकत रहा। हुवाँ सोने अउ चाँदी क चौकियन रहिन। इ सबइ चौकियन लाल अउ सफेद रंग क अइसी स्फटिक क भूमितल मैं जुड़ी भई रहिन जेहमाँ संगमरमर, प्रकेलास, सीप अउ दूसर कीमती पाथर जड़े रहेन। **7**सोने क पियालन मैं दाखरस परोसा गवा रहा। हर पियाला एक दूसरे स अलग रहा। महाराजा क ओकर महान सम्पत्ति क अनुसार दाखरस परोसा गवा रहा। **8**महाराजा अपने सेवकन क आग्या दिहेस कि हर कउनो मेहमेन क जेतना दाखरस उ चाहे ओतनी दीन्ह जाइ। **9**राजा क महल मैं ही महारानी वसती भी मेहररुअन क एक ठु भोज दिहस। **10**भोज क सातएँ दिन, महाराजा छयर्स दाखरस पिअइ क कारण मगन रहा। उ ओन सात हिजड़न क आग्या दिहस जउन ओकर सेवा किया करत रहेन। एन हिजड़न क नाउँ रहेन: गहूमान, बिजता, हबौना, बिगता, अबगता, जेतेर अउर कर्कस। महाराज आपन सेवकन क आग्या किहेस **11**उ पचे राजमुकुट धारण किए भए महारानी वसती क ओकरे लगे लिआवई। उ चाहत रहा कि उ मुखिया लोगन अउर महत्वपूर्ण लोगन क अपनी सुन्दरता देखाइ काहेकि उ फुरइ बहोत सुन्नर रही।

**12**मुला उ सेवकन जब राजा क आदेस क बात महारानी वसती स कहेन तउ उ हुवाँ जाइ स मना कइ

दिहस। राजा बहोत कोहाइ गवा अउर उ ओह पइ क्रोध स जरइ लाग। **13-14**एह बरे महाराज इ ताज़ा घटना क बारे मैं अपने अनुभवी मनइयन स बात किहेस। इ रीति रहा कि राजा अपने अनुभवी मनइयन स नेम अउ सज़ा क बारे सलाह लेत रहत रहेन। इ सबइ अनुभवी मनई महाराजा क बहोत निचके रहेन। एनकर नाउँ रहेन: कर्सना, सेतार, अदमाता, तर्सीस, मेरेस, मर्सना अउर ममूकान। इ सबइ सातहुँ फारस अउर मादै क बहोत महत्वपूर्ण अधिकारी रहेन। एके लगे राजा स मिलइ क बिसेस अधिकार रहा। उ पचे राज् मैं सबन त उच्च अधिकारी रहेन। **15**राजा ओन लोगन स पूछेस, “महारानी वसती क संग का कीन्ह जाइ? इ बारे मैं नेम का कहत ह? उ महाराजा छयर्स क उ मोर आग्या क मानइ स मना कइ दिहस जेका हिजड़न ओकरे लगे लइ गए रहेन।”

**16**एह पइ दूसर अधिकारियन क उपस्थिति मैं महाराजा स ममूकान कहेस, “महारानी वसती अपराध किहस ह। महारानी महाराजा क संग-संग सबहिँ मुखिया लोगन अउर महाराजा छयर्स क सबहिँ प्रदेसन क लोगन क बिरुद्ध अपराध किहेस ह। **17**मई अइसा एह बरे कहत हउँ कि दूसर मेहररुअन जउन महारानी वसती किहस ह, ओका जब सुनिहीं तउ उ पचे अपने भतारन क आग्या मानब बंद कइ देइहीं। उ पचे अपने भतारन स कहिहीं, ‘महाराराजा छयर्स महारानी वसती क अपने लगे लिआवइ क आग्या दिहे रहा किन्तु उ आवह स मना कइ दिहस।’

**18**“आनु फारस अउ मादै क मुखिया लोगन क मेहररुअन, रानी जउन किहे रही, सुनि लिहन ह अउर लखा अब उ सबइ मेहररुअन भी जउन कछू महारानी किहस ह, ओहसे प्रभावित होइहीं। उ सबइ मेहररुअन राजा लोगन क महत्वपूर्ण मुखिया लोगन क संग वइसा ही करिहीं अउर इ तरह बहोत जियादा अनादर अउर किरोध फइल जाइ। **19**तउ जदि महाराजा क अच्छा लगइ तउ एक ठु सुआव इ अहइ: महाराजा क एक राजाग्या देइ चाही अउर ओका फारस अउ मादै क नेम मैं लिख दीन्ह जाइ चाही एह बरे इ नेम ना ही बदला जाइ सकत ह या न ही संसोधन कीन्ह जाइ सकत। राजा क आग्या इ होइ चाही: महाराजा छयर्स क समन्वा रानी वसती अब कबहुँ न आवइ। साथ ही महाराजा क रानी क पद भी कउनो अइसी मेहररुअन क देइ चाही जउन ओहसे उत्तम होइ। **20**फुन जब राजा क इ आग्या ओकरे बिसाल राज् क सबहिँ हीसन मैं घोसित कीन्ह जाइ, तउ सबहिँ मेहररुअन अपने भतारन क आदर करइ लगीहीं, चाहे ओकर भतारन महत्वपूर्ण लोग अहइ या न अहइ।”

21इ सुआव स महाराजा अउर ओकर बड़े-बड़े अधिकारी सबहिं खुस भएन। तउ महाराजा छयर्स वइसा ही किहस जइसा ममूकान सुझाए रहा। 22महाराजा छयर्स अपने राज क सबहिं प्रान्तन में पत्रन पठइ दिहस। हर प्रान्त में जउन पत्रन पठवा गवा, उ उहइ प्रान्त क लिपि में लिखा गवा रहा। हर जाति में उ ओकरे भाखा में पत्रन पठएस। उ पचे पत्रन में हरेक व्यक्ति क भाखा में इ घोसना कीन्ह ग रहेन कि हरेक मनई क आपन परिवार पइ नियंत्रण रखइ क होइ।

### एस्तेर महारानी बनाई गइ

2 आगे चलिके महाराजा छयर्स क क्रोध सान्त भवा तउ ओका वसती अउर वसती क कार्य याद आवइ लागेन। वसती क बारे में उ जउन आदेस दिहे रहा, उ भी ओका याद आवा। 2एकरे पाछे राजा क निजी सेवकन ओका एक ठु सुझाव दिहन। उ पचे कहेन, “राजा क बरे सुन्नर कुँवारी कन्यन क खोज करा। 3हे राजा, तोहका अपने राज क हर प्रान्त में नेतन क चुनाव करइ चाही। फुन ओन नेतन लोगन क चाही कि उ पचे सुन्नर कुँवारी कन्याओं क सूसन क जिला महल में लइके आवई। उ पचे लइकियन राजा क हरम सरा में तोहार दूसरी मेहररूअन क संग रहब। उ पचे हेगे क देख-रेख में रखी जइहीं। हेगे महाराजा क हिजड़ा जउन कि ओन मेहररूअन क निगारोंकार अहइ। फुन ओनका सुन्नरता क प्रसाधन दीन्ह जाई। 4फुन उ लरकी जउन राजा क भावइ, वसती क जगह पइ राजा क नई महारानी बनाइ दीन्ह जाइ।” राजा क इ सुआव बहोत अच्छा लगा। तउ उ एका अंगीकार कइ लिहस।

5बिन्यामीन परिवार समूह क मोर्दकै नाउँ क एक ठु यहूदी हुवाँ रहा करत रहा। मोर्दकै याईर क पूत रहा अउर याईर सिमी क पूत रहा अउर सिमी कीस क पूत रहा। सूसन क महल प्रान्त में रहत रहा। 6ओहका यरुसलेम स बाबेल क राजा नबूकदनेस्सर बंदी बनाइके लइ गवा रहा। उ यहूदा क राजा यकोन्याह क संग उ दल में रहा, जेका बंदी बनाइ लीन्ह गवा रहा। 7मोर्दकै क हदस्सा नाउँ क एक चचेरी बहिन रही। उ अनाथ रही। न ओकरे बाप रहा, न महतारी। तउ मोर्दकै ओकर धियान रखत रहा। मोर्दकै ओकरे महतारी बाप क मरइ क पाछे ओका अपनी बिटिया क रूप में गोद लइ लिहे रहा। हदस्सा क नाउँ एस्तेर भी रहा। एस्तेर क मुँह अउ ओकरे तने क बनावट बहोत सुन्नर रही।

8जब राजा क आदेस सुनावा गवा, तउ सूसन क जिला महल में बहोत स जवान मेहररूअन क लिआवा गवा। ओन जावान मेहररूअन क हेगेक देख-रेख में रख दीन्ह गवा। एस्तेर एनहीं जवान मेहररूअन में स एक रही। एस्तेर क राजा क महल में लइ जाइके हेगे क देख-रेख में रख दीन्ह गवा रहा। हेगे मेहररूअन क महल क निगारोंकार रहा। 9हेगे क एस्तेर बहोत अच्छी लगी। उ ओकर मनपसंद बन गइ। हेगे हाली ही सुन्नरता क उपचार अउ जरूरी भोजन ओका दिहस। हेगे राजा क महल स सात दासियन चुनेस अउ ओनका एस्तेर क दइ दिहस। अउर एकरे पाछे हेगे एस्तेर अउ ओकर सातहुँ दासियन क जहाँ राजघराने क मेहररूअन रहा करत रहिन। 10एस्तेर इ बात कउनो क नाहीं

बताएस कि उ एक यहूदी अहइ। काहेकि मोर्दकै ओका मना कइ दिहे रहा, एह बरे उ अपने परिवार क पृष्ठभूमि क बारे में कउनो क कछू नाहीं बताएस। 11मोर्दकै जहाँ रनवास क मेहररूअन रहा करत रहिन, हुवाँ आसपास अउर आगे पाछे घूमा करत रहा। उ इ पता लगावइ चाहत रहा कि एस्तेर कइसी अहइ अउर ओकरे संग का कछू घटत अहइ? एह बरे उ अइसा करत रहा।

12एहसे पहिले कि राजा छयर्स क लगे जाइ क बरे कउनो लइकी क बारी आवत, ओका इ सब करइ क पड़त रहा। बारह महीने तलक ओका सुन्नरता उपचार करइ पड़त रहा यानी छः महीने तलक ओका गंधरस क तेल लगावा जात अउर छः महीने तलक सुगंधित द्रव्य अउर तरह-तरह क प्रसाधन सामग्रियन क उपयोग करइ होत रहा। 13रीति क अनुसार जब कउनो जवान लइकी राजा क लगे जाइ ओनका उ सबहिं दीन्ह जात ह जेका उ मेहरारू महल स राजा क महल में लेइ जात चाहत ह। 14सौँझ क समइ उ लइकी राजा क महल में जात अउर भिंसारे दूसर मेहरारू क महल में उ लउटि आवत। फुन ओका सासगज नाउँ क मनई क देखरेख में रख दीन्ह जात। सासगज राजा क हिजड़ा रहा जउन राजा क रखैलन क अधिकारी रहा। जदि राजा ओहसे खुस न होता, तउ उ लइकी फुन कबहुँ राजा क लगे न जात। अउर जदि राजा ओहसे खुस होत तउ ओका राजा नाउँ लइके वापस बोलावत।

15जब एस्तेर क राजा क लगइ जाइ क बारी आइ, तउ उ कछू नाहीं पूछेस। उ राजा क हिजड़ा, हेगे स, जउन रनवास क आधिकारी रहा, बस उहइ लिहस जउन हेगे ओका आपन संग लेइ क कहेस। (एस्तेर उ लइकी रही जेका मोर्दकै गोद लइ लिहे रहा अउर जउन ओकरे चाचा अबीहैल क बिटिया रही।) एस्तेर क जउन कछू भी लखत, ओका पसंद करत रहा। 16तउ एस्तेर क महाराजा छयर्स क महल में लइ जावा गवा। इ उ समइ भवा जब ओकरे राजकाल क सताएँ बरिस क तेबत नाउँ क दसवाँ महीना चलत रहा।

17राजा एस्तेर कउनो भी अउर लरकी स जियादा पिरेम किहस अउर उ ओकर कृपा पाएस। कउनो भी दूसर लरकी स जियादा, राजा क उ भाइ गइ। तउ राजा छयर्स एस्तेर क मूँड़ि पइ मुकुट पहिराइके वसती क जगह पइ नई महारानी बनाइ लिहस। 18तब राजा एस्तेर क बरे एक बहोत बड़का भोज दिहस। इ भोज ओकरे महत्वपूर्ण मनइयन अउर मुखिया लोगन क बरे रही। उ सबहिं प्रान्तन में छुट्टी क घोसणा कइ दिहस। लोगन क ओकरे साही सम्पत्ति क अनुसार उपहार दिहस।

### मोर्दकै क एक बहोत बुरी योजना क पता चला

19मोर्दकै उ समइ राजदुआर क निअरे ही बइठा रहा, जब दूसरी दाई लरकियन क एकट्ठा कीन्ह गवा रहा। 20एस्तेर भी अबहुँ भी इ रहस्य क छुपाए भए रही कि उ एक यहूदी रही। अपने परिवार क पृष्ठभूमि क बारे में उ कउनो क कछू नाहीं बताए रही, काहेकि मोर्दकै ओका अइसा करइ स रोक दिहे रहा। उ मोर्दकै क आग्या क अब

भी वइसे पालन करत रही, जइसे उ तब किहे, करत रही, जब उ मोर्दैकै क देख-रेख में रही।

21उहइ समइ जब मोर्दैकै राजदुआर क निअरे बइठा करत रहा, इ घटना घटी: राजा क दुइ अधिकारियन बिकतान अउर तेरेस जउन साही दुआर क रच्छा करत रहेन, उ पचे राजा पइ बहोत कोहाई गएन अउर ओकर हत्या करइ क योजना बनाएन। 22मोर्दैकै क उ सड्यंत्र क पता चल गवा अउर उ ओका महारानी एस्तेर क बताइ दिहस। फुन महारानी एस्तेर ओका राजा स कहि दिहस। उ राजा क इ भी बताइ दिहस कि मोर्दैकै ही उ मनई अहइ, जउन इ सड्यंत्र क पता चलाएस ह। 23एकरे पाछे उ सूचना क जाँच कीन्ह गइ अउर इ पता चला कि मोर्दैकै क सूचना सही रही अउर उ दुइ पहरेदारन क जउन राजा क मार डावइ क सड्यंत्र बनाए रहेन, एक ठु खम्भे पइ लटकाइ दीन्ह गवा। राजा क सामने ही इ सबहिं बातन राजा क इतिहास क पुस्तक में लिख दीन्ह गइन।

### यहूदियन क बिनास क बरे हामान क योजना

3 एन बातन क घटइ क पाछे महाराजा छयर्स हामान क सम्मान किहस। हामान अगागी हम्मदाता नाउँ क मनई क पूत रहा। महाराजा हामान क कउनो दूसर अधिकारियन स जउन ओकर संग रहेन स बइका अउ महत्वपूर्ण पद दिहस। 2राजा क दुआर पइ महाराजा क सबहिं मुखिया हामान क अगवा निहुरिके ओका आदर देइ लागेन। उ पचे महाराजा क आग्या क अनुसार ही अइसा किया करत रहेन। किन्तु मोर्दैकै हामान क अगवा निहुरइ या ओका आदर देइ क मना कइ दिहस। 3एह बरे राजा क दुआर पइ राजा क दूसर सेवकन मोर्दैकै स पूछेन, “तू महाराजा क आग्या क पालन काहे नाहीं किहा?”

4राजा क सबइ अधिकारियन हररोज मोर्दैकै स बात किहन, किन्तु उ हामान क आदेस क मानइ स इन्कार करत रहा। तउ ओन अधिकारियन हामान स एकरे बारे में बताइ दिहन, काहेकि उ पचे इ सबइ जानइ चाहत रहेन कि का मोर्दैकै क इ बेउहार क लगातार रहइ क अनुमति होइ। काहेकि मोर्दैकै ओन सबइ लोगन क बताइ दिहे रहा कि उ एक यहूदा रहा। 5हामान जब इ लखेस कि मोर्दैकै ओकरे अगवा निहुरइ अउर ओका आदर देइ क मना कइ दिहस ह तउ ओका बहोत किरोध आवा। 6हामान क इ पता तउ चल ही चुका रहा कि मोर्दैकै एक यहूदी अहइ। किन्तु उ मोर्दैकै क हत्या मात्र स संतुस्ट होइवाला नाहीं रहा। हामान तउ इ भी चाहत रहा कि उ कउनो एक अइसा रस्ता ढूँढ निकारइ जेहसे छयर्स क समूचे राज क ओन सबहिं यहूदियन क मार डावइ जउनो मोर्दैकै क लोग अहइ।

7महाराजा छयर्स क राज क बारहवें बरिस में नीसान नाउँ क पहिले महीने में, हामान क मौजूदगी में यहूदी लोगन क बर्बाद करइ क दिन चुनई बरे पास लोकावा गवा। इ तरह अदार नाउँ क बारहवें महीना चुन लीन्ह गवा। (ओन दिनन लाटरी निकारइ बरे इ सबइ पासन, “पुर” कहवावा करत रहेन।) 8फुन हामान महाराजा छयर्स क लगे आवा अउर ओहसे बोला, “हे महाराजा छयर्स तोहरे राज क हर प्रान्त में

लोगन क बीच एक खास समूह क लोग फइले भए अहइ। इ सबइ लोग अपने आप क दूसर लोगन स अलग रखत हीं। एन लोग क रीतिरिवाज भी दूसर लोगन स अलग अहइ अउर इ सबइ लोग राजा क नेमन क पालन नाहीं करत हीं। अइसे लोगन क अपने राज में सखइ क अनुमति देब महाराजा क बरे अच्छा नाहीं अहइ।

9“जदि महाराजा क अच्छा लगइ तउ मोरे लगे एक सुझाव अहइ: ओन लोगन क नस्ट कइ डावइ क आग्या दीन्ह जाइ। एकरे बरे मई साही अधिरियन क दस हजार चाँदी क सिक्कन महाराजा क खजाने में जमा करइ बरे देब।”

10इ तरह महाराजा राजकीय अंगूठी अपनी अँगुरि स निकारेस अउर ओका हामान क सौप दिहस। हामान अगागी हम्मदाता क पूत रहा। उ यहूदियन क दुस्मन रहा। 11एकरे पाछे महाराजा हामान स कहेस, “इ धन अपने लगे रखा अउर ओन लोगन क संग जउन चाहत ह, करा।”

12फुन उ पहिले महीने क तेरहवें दिन महाराजा क सचिवन क बोलावा गवा। उ पचे हामान क सबहिं आदेसन क हर प्रान्त क लिपि अउर हर लोगन क भाखा में अलग-अलग लिख दिहस। उ पचे राजा क मुखिया लोगन, विभिन्न प्रान्तन क राजपालन, अलग-अलग कबीलन क मुखिया लोगन क नाउँ पत्र लिख दिहस। उ पचे इ आदेस महाराजा छयर्स कइँती स लिखेन अउर ओह पइ खुद क अंगूठी स मोहर लगाइ दिहस।

13सँदेस वाहक राजा क विभिन्न प्रान्तन में ओन पत्रन क लइ गएन। एन पत्रन पइ इ आदेस रहा कि सबहिं यहूदियन जवान, बूढ़े, मेहररु अउर नान्ह गदेलन क भी एक ही दिन मार दीन्ह जाइँ अउर पूरी तरह नस्ट कइ दीन्ह जाइ। उ दिन बारहवें महीने क तेरहवीं तारीख क रहा जउन अदार क महीना अहइ। अउर इ भी आदेस रहा कि यहूदियन क सब कछू चिजिय लइ लीन्ह जाइ।

14एन पत्रन क प्रतिपन उ आदेस क संग एक नेम क रूप में दीन्ह जाब रही। हर प्रान्त में एका एक नेम बनावा जाब रहा। सबहिं लोगन में एकर घोसना कीन्ह जाब रही, ताकि उ पचे सबहिं लोग उ दिन क बरे तइयार रहइँ। 15महाराजा क आग्या अनुसार सँदेस वाहक फउरन चल दिहन। अउर इ राजधानी नगरी सूसन में भी इ ऐलान कइ दीन्ह गइ। महाराजा अउर हामान तउ दाखरस पिअइ क बरे बइठ गएन किन्तु सूसन नगर क लोग घबरा गए रहेन अउ चकित भए रहेन।

### मदद क बरे एस्तेर स मोर्दैकै क बिनती

4 मोर्दैकै, जउन कछू होत रहा, ओकरे बारे में सब कछू सुनेस। जब उ यहूदियन क बिरुद्ध राजा क आग्या सुनेस तउ अपने ओढ़नन फार डाएस। उ सोक वस्त्र धारण कइ लिहस अउर अपने मँडू पइ राखी डाइ लिहस। उ ऊँच सुर स बिलाप करत भए नगर में निकर पड़ा। 2मोर्दैकै राजा क दुआर तलक गएन, किन्तु उ दुआर क पार नाहीं किहेन जउन महल क छेत्र में जात ह, काहेकि सोक वस्त्रन क

पहिरके दुआर क भीतर जाइ क आग्या कउनो क भी नाहीं रही। 3हर कउनो प्रांत में जहाँ कहूँ भी राजा क इ आदेस पहोचा, यहूदियन में रोउब-धोउब अउर सोक फइल गवा। उ पचे खाना छोड़ दिहन अउर उ पचे ऊँच सुर में बिलपइ लागेन। बहोत स यहूदी अपने सोक वस्त्रन क धारण किहे भए अउर अपने मूंडन पइ राखी डाए भए धरती पइ पड़े रहेन।

4एस्तेर क दासियन अउर खोजन एस्तेर क लगे जाइके ओका मोर्दैके क बारे में बताएन। एहसे महारानी एस्तेर बहोत दुखी अउर बियाकुल होइ उठी। उ मोर्दैके क लगे सोक वस्त्रन क बजाय दूसर ओढ़नन पहिरइ क पठएस। मुला उ उ सबइ ओढ़नन स्वीकार नाहीं किहस। 5एकरे पाछे एस्तेर हताक क अपने लगे बोलाएस। हताक एक अइसा हिजड़ा रहा जेका राजा ओकरी सेवा बरे नियुक्त केहे रहा। एस्तेर ओका इ पता लगावइ क आदेस दिहस कि मोर्दैके क का बियाकुल बनाए भए अहई अउर काहे? 6एह बरे हताक नगर क खुले चौराहे में गएन जहाँ मोर्दैके मौजूद रहा। 7हुवाँ मोर्दैके हताक स, जउन कछू भवा रहा, सब कहि डाएस। उ हताक क इ भी बताएस कि हामान यहूदियन क हत्या बरे राजा क खजाने में केतना धन जमा करावइ क वादा किहेस ह। 8मोर्दैके हताक क यहूदियन क हत्या क बरे राजा क आदेस पत्र क एक प्रति भी दिहेस। उ आदेस पत्र पहिले ही सूसन नगर में हर कहूँ पठवा गवा रहा। मोर्दैके इ चाहत रहा कि हताक ओका एस्तेर क देखाइ देइ अउर हर बात ओका पूरी तरह निर्देस देइ अउर उ ओहसे इ भी कहेस कि उ एस्तेर क राजा क लगे जाइके मोर्दैके अउर अपने लोगन क बरे दया क याचना करइ क प्रेरित करइ।

9हताक एस्तेर क लगे लउटि आवा अउर उ एस्तेर स मोर्दैके जउन कछू कहइ क कहे रहा, सब बताइ दिहस।

10फुन एस्तेर मोर्दैके क हताक स इ कहवाइ पठएस: 11“मोर्दैके, राजा क सबहिं मुखिया अउर राजा क प्रान्तन क सबहिं लोग इ जानत हीं कि कउनो भी मनई या मेहरारू क बरे राजा क बस इहइ नेम अहइ कि राजा क भीतरी आंगन में बिना बोलाए जउन भी जात ह, ओका मारि दीन्ह जातेन। इ नेम क पालन बस एक ही स्थिति में उ समइ नाहीं कीन्ह जात रहा जब राजा अपने सोने क राजदण्ड क उ मनई कइती बढ़ाइ देत रहा। यदि राजा अइसा कइ देत तउ उ मनई क प्राण बच जात रहेन। मुला मोका तीस दिन होइ गएन ह अउर राजा स मिलइ क बरे मोका नाहीं बोलावा गवा ह।”

12-13एकरे पाछे एस्तेर क सँदेसा मोर्दैके क लगे पहोँचाइ दीन्ह गवा। उ सँदेसा क पाइके मोर्दैके ओका वापस जवाब पठएस: “एस्तेर, अइसा जिन सोचा कि तू राजा क महल में रहइ क कारण बच जाब्या, जबकि सबइ यहूदियन मारा जाब। 14जदि अबहिं तू चुप रहति अहा यहूदियन क मदद अउर मुक्ती कहुँ अउर स मिल जाब। मुला तू अउर तोहरे बाप क परिवार मारा डावा जाइ सकत्या। अउर कउन जानत ह कि तू कउनो अइसे ही समइ क लिए महारानी बनाई गई अहा, जइसा समइ इ अहइ।”

15-16एह पइ एस्तेर मोर्दैके क आपन इ जवाब पठएस: “मोर्दैके, जा अउर जाइके सबहिं सूसन नगर सबहिं यहूदी लोगन क एकट्ठा करा अउर मोरे बरे उपवास राखा। तीन दिन अउ तीन रात तलक न कछू खा अउर न कछू पिआ। तोहरी तरह मई अउर मोर मेहरारू नउकर भी उपवास रखब। हमरे उपवास रखइ क पाछे मई राजा क लगे जाब। मई जानत हउँ कि जदि राजा मोका न बोलावइ तउ ओकरे लगे जाब, नेम क खिलाफ अहइ। अगर मई अइसा करब्या तउ हो सकत ह कि मई मारा डावइ जाइ। किन्तु कउनो बात नाहीं मई अइसा करब।”

17इ तरह मोर्दैके हुवाँ स चला गवा अउर एस्तेर ओहसे जइसा करइ क कहे रहा उ सब कछू वइसा ही किहस।

### एस्तेर क राजा स बिनती

5 तीसरे दिन एस्तेर आपन बिसेस साही पोसाक पहिरेस अउर राजमहल क भीतरी आंगन में जाइ खड़ी भइ। इ जगह राजा क बैठका क समन्वा रही। राजा दरबार में अपने सिंहासने पइ बइठा रहा। राजा उहइ कइती मुँह किहे बइठा रहा जहाँ स लोग सिंहासन क कच्छ कइती प्रवेस करत रहेन। 2तउ राजा महारानी एस्तेर क हुवाँ दरबार में खड़े लखेस। ओका लखिके उ बहोत खुस भवा। उ ओकरी कइती अपने हाथ में थामे भए सोने क राजदण्ड क आगे बढ़ाइ दिहस। इ तरह एस्तेर उ कमरे में प्रवेस किहस अउर उ राजा क लगे चली गइ अउर उ राजा क सोने क राजदण्ड क सिरे क छुइ लिहस।

3एकरे पाछे राजा ओहसे पूछेस, “महारानी एस्तेर, तू बेचैन काहे अहा? तू मोहसे का चाहति अहा? तू जउन चाहा मई तोहका उहइ देब। हिआँ तक कि आपन आधा राज तलक, मई तोहका दइ देब।”

4एस्तेर कहेस, “मई आपके अउर हामान क बरे एक तु भोज क आयोजन किहेउँ ह। कृपा कइ आप अउर हामान आजु मोरे हिआँ भोज में पधारें।”

5एह पइ राजा कहेस, “हामान क तुरंत बोलावा जाइ ताकि एस्तेर जउन चाहत ह, हम ओका पूरा कइ सकी।”

तउ महाराजा अउर हामान एस्तेर ओनके बरे जउन भोजन आयोजित किहे रही, ओहमाँ आइ गएन। 6जब उ पचे दाखरस पिअत रहेन तबहिं राजा एस्तेर स फुन पूछेस, “एस्तेर, कहा अब तू का माँगति चाहति अहा? कछू भी माँग ल्या, मई तोहका उहइ दइ देब। कहा तउ उ का अहइ जेकर तोहका इच्छा अहइ? तोहार जउन भी इच्छा होइ, उहइ मई तोहका देब। अपने राज क आधा हीसां तलक।”

7एस्तेर कहेस, “मई इ माँगइ चाहत हउँ। 8जदि मोका महाराज अनुमति देई अउर जदि जउन मई चाहउँ, उ मोका देइ स महाराज खुस होई तउ मोर इच्छा इ अहइ कि महाराज अउर हामान भियान मोरे हिआँ आवई। भियान मई महाराज अउर हामान क बरे एक अउर भोज देइ चाहत हउँ अउर उहइ समइ में इ बताउब कि असल में मई का चाहति हउँ।”

### मोर्दैकै पइ हामान क किरोध

9उ दिन हामान राजमहल क बहोत जियादा खुस होइके बिदा भवा। किन्तु जब उ राजा क दुआर पइ मोर्दैकै क लखेस तउ ओका मोर्दैकै पइ बहोत किरोध आवा। हामान मोर्दैकै क लखत ही किरोध स पागल होइ उठा, काहेकि जब हामान हुवाँ स गुजरा, मोर्दैकै नाहीं खड़ा भवा अउर नाहीं काँपिस अउर नाहीं हामान बरे कउनो आदर देखाएस। 10किन्तु हामान अपने किरोध पइ काबू किहस अउर घरे चला गवा। एकरे पाछे हामान अपने मीतन अउ अपनी मेहरारु जेरेस क एक संग बोलाएस। 11उ अपने मीतन क अगवा अपने धन अउ अनेक पूतन क बारे में डीगं मारत भए इ बतावइ लागा कि राजा ओकर कउने प्रकार स सम्मान करत ह। उ बढ़ाइ चढ़ाइ के इ भी बतावइ लाग कि दूसर सबहिं हाकिमन स राजा कउने तरह ओका अउर जियादा ऊँच पद पइ पदोन्नति दिहस ह। 12“एतना ही नाहीं” हामान इ भी बताएस। “एक मात्र मई ही अइसा मनई हउँ जेका महारानी एस्तेर अपने भोज में राजा क संग बोलाए रहा अउर महारानी मोका भियान फुन राजा क संग बोलाइ पठए रही। 13मुला मोका एन सब बातन स फुरइ कउनो खुसी नाहीं अहइ। असल में मई उ समइ तलक खुस नाहीं होइ सकत जब तलक राजा क दुआर पइ मई उ यहूदी मोर्दैकै क बइठे भए लखत हउँ।”

14एह पइ हामान क मेहरारु जेरेस अउर ओकर मीतन ओका एक सुझाव दिहन। उ पचे बोलेन, “कउनो स कहिके पचहत्तर फुट ऊँच ओका फाँसी देइ क एक तु फाँसी क खम्भा खड़ा करा। फुन भिंसारे राजा स कहा कि उ मोर्दैकै क ओह पइ लटकइ क आदेस दे। फुन राजा क संग तू भोज पइ जाया अउर आनन्द स रह्या।”

हामान क इ सुआव नीक लगा। तउ उ फाँसी क खम्भा बनवावइ क बरे कउनो क आदेस दइ दिहस।

### मोर्दैकै क सम्मान

6 उ राति राजा सोइ नाहीं पावा। तउ उ अपने एक दास स इतिहास क किताब लिआइके अपने समन्वा ओका बाँचइ क कहेस। (राजा लोगन क इतिहास क किताबे में उ सब कछू अंकित रहत ह जउ एक राजा क सासनकाल क दौरान धटित होत ह।) 2तउ उ दास राजा क बरे उ किताब बाँचेस। उ महाराजा छयर्स क मार डावइ क सड्यंत्र क बारे में बाँचेस। बिगताना अउ तेरेस क सड्यंत्रन क पता मोर्दैकै क चला रहा। इ सबइ दुईनउँ ही मनई दुआर क रच्छा करइवाले राजा क हाकिम रहेन। उ पचे राजा क हत्या क योजना बनाए रहेन किन्तु मोर्दैकै क इ योजना क पता चल गवा रहा अउर उ ओकरे बारे में कउनो क बताइ दिहे रहा।

3एह पइ महाराजा सवाल किहस, “इ बात क बरे मोर्दैकै क कउन सा आदर अउर कउन स उत्तिम चिजियन प्रदान कीन्ह गइ रहिन।” उ दासन राजा क जवाब दिहेन, “मोर्दैकै बरे कछू नाहीं कीन्ह गवा रहा।”

4उहइ समइ राजा क महल क बाहरी आँगन में हामान प्रवेस किहस। उ, हामान फाँसी क जउन खम्भा बनावावा रहा, ओह पइ मोर्दैकै क लटकवावइ क बरे राजा स कहइ

क आवा रहा। राजा ओकरी आहट सुनिके पूछेस, “अबहिं अबहिं आँगन में कउन आवा ह?”

5राजा क नौकरन जवाब दिहस, “आँगन में हामान खड़ा भवा ह।” तउ राजा कहेस, “ओका भीतर लइ आवा।”

6हामान जब भीतर आवा तउ राजा ओहसे एक सवाल पूछेस, “हामान, राजा जदि कउनो क आदर देइ चाहइ तउ उ मनई बरे राजा क का करइ चाही?”

हामान अपने मने में सोचेस, “अइसा कौन होइ सकत ह जेका राजा मोहसे जियादा आदर देइ चाहत होइ? राजा निहचइ ही मोका आदर देइ क बरे ही बात करत होइ।”

7तउ हामान जवाब देत भए राजा स कहेस, “राजा जेका आदर देइ चाहत ह, उ मनई क संग उ अइसा करइ: 8राजा जउन ओढ़ना खुदपहिरे होइ, उहइ बिसेस ओढ़ना क तू अपने सेवकन स मँगवाइ लीन्ह जाइ अउर उ घोड़े क भी मँगवाइ लीन्ह जाइ जेह पइ राजा खुद सवारी कीन्ह होइ। फुन सेवकन क जरिये उ घोड़े क मूँड़ि पइ राजा क बिसेस चीन्ह अंकित करावा जाइ। 9एकरे पाछे, राजा क सज्जन अधिकारी कपड़े अउर घोड़े क अधिकारी होइ चाही। फुन उ राजा क अधिकारी उ मनई क, जेका राजा सम्मानित करइ चाहत ह, उ ओढ़ना क पहिरावइ अउर फुन एकरे पाछे उ पचे अधिकारी उ घोड़े क आगे-आगे चलत भवा ओका नगर क गलियन क बीच स गुजारइ। उ पचे अपनी अगुवाई में घोड़न क लइ जात भए इ घोसना करत जाइ, ‘इ उ मनई क बरे कीन्ह गवा ह, राजा जेका आदर देइ चाहत ह।’”

10राजा हामान क आदेस दिहस, “तू फउरन चले जा अउर ओढ़ना अउ घोड़ा लइके यहूदा मोर्दैकै क बरे वइसा ही करा, जइसा तू सुझाव दिहा ह। मोर्दैकै राजदुआर क लगे बइठा बाटइ। जउन कछू तू सुझाया ह, सब कछू वइसा ही करया।”

11तउ हामान ओढ़ना अउ घोड़ा लिहस अउर ओढ़ना मोर्दैकै क पहिराइके घोड़े पइ चढ़ाइके नगर क गलियन स होत भए घोड़े क आगे आगे चल दिहस। मोर्दैकै क आगे आगे चलत भवा हामान घोसणा करत रहा, “इ सब उ मनई क बरे कीन्ह गवा ह, जेका राजा आदर देइ चाहत ह।” 12एकरे पाछे मोर्दैकै फुन राजदुआर पइ चला गवा किन्तु हामान फउरन अपने घरे कइँती चल दिहस। उ आपन मूँड़ि छुपाए भए रहा काहेकि उ परेसान अउर लज्जित रहा। 13एकरे पाछे, हामान अपनी मेहरारु जेरेस अउर अपने सबहिं मीतन स जउन कछू घटा रहा, सब कछू कहि सुनाएस। हामान क पत्नी अउर ओकर सलाहकारन ओहसे कहेन, “जदि मोर्दैकै यहूदी अहइ, तउ तू जीत नाहीं सकत्या। तू आपन सक्ती खोइ सुरू करि चुका ह। तू निहचइ ही नस्ट होइ जाब्या।” 14अबहिं उ सबइ लोग हामान स बात करत ही रहेन कि राजा क हिजड़ा हामान क घरे आएन अउर फउरन ही हामान क एस्तेर क भोज में बोलाइ लइ गएन।

### हामान क प्राण दण्ड

7 फुन राजा अउ हामान एक संग महारानी एस्तेर क भोज बरे चले गएन। 2एकरे पाछे जब उ पचे दूसरे

दिन क भोज में दाखरस पिअत रहेन तउ राजा एस्तेर फुन एक सवाल किहस, “महारानी एस्तेर, तू मोहसे का माँगइ चाहति अहा? जउन कछू तू माँगबिउ, पउबिउ। बतावा, तोहका का चाही? मई तोहका कछू भी दइ सकत हउँ। हिअँ तलक कि मोर आधा राज भी।”

3एह पइ महारानी एस्तेर जवाब दिहस, “हे महाराज! जदि मई तोहका भावतिउँ, अउर जदि इ तोहका प्रसन्न करत ह। तउ कृपा कइके मोका जिअइ द्या अउर मई तोहसे इ चाहति हउँ कि मोरे लोगन क भी जिअइ द्या। बस मई इहइ माँगति हउँ। 4अइसा मई एह बरे चाहति हउँ कि मोका अउर मोरे लोगन क बिनास, हत्या अउ पूरी तरह स नस्त कइ डावइ क बरे बेच डावा गवा ह। जदि हमका दासन क रुप में बेचा जात, तउ मई कछू नाहीं कहतिउँ काहेकि कउनो एतनी बड़ी समस्या नाहीं होत जेकरे बरे राजा क कस्त दीन्ह जात।”

5एह पइ महाराज छयर्स महारानी एस्तेर स पूछेस, “तोहरे संग अइसा कौन किहस? कहाँ अहइ उ मनई जउन तोहरे लोगन क संग अइसा बेउहार कइ क हिम्मत किहस?”

6एस्तेर कहेस, “हमार बिरोधी अउर हमार दुस्मन इ दुस्त हामान ही अहइ।”

तब हामान राजा अउ रानी क सामने आतंकित होइ उठा। 7राजा बहोत कोहान रहा। उ खड़ा भवा। उ आपन दाखरस हुवँइ तजि दिहस अउर बाहेर बगिया मैं चला गवा। मुला हामान, रानी एस्तेर स अपने प्राणन क भीख माँगइ बरे भीतर ही ठहरा रहा। हामान इ जानत रहा कि राजा ओकर प्राण लेइ क निहचइ कइ लिहस ह। एह बरे उ अपने प्राणन क भीख माँगत रहा। 8राजा जइसे ही बगिया स भोज क कमरे कइँती वापस आवत रहा, तउ उ का लखत ह कि जउने बिछौने पइ एस्तेर ओलरी अहइ, ओह पइ हामान निहुरा भवा अहइ। राजा किरोध भरे सुर मैं कहेस, “महल मैं मोरे रहत भए महारानी पइ आक्रमण कइ क तोहार हिम्मत कइसा भवा।” जइसेन ही राजा क मुँह स इ सबइ सब्द निकरेन, राजा क सेबकन भीतरे आइके हामान क मार डाएस।\*

9राजा क एक ठु हिजड़ा सेवक जेकर नाउँ हरबोना रहा, कहेस, “हुवाँ एक पचहतर फुट ऊँचा फाँसी क खम्बा जउन हामान क दुआरा ओकरे घरे क लगे मोर्दकै क फाँसी देइ बरे खड़ा किहा गवा ह। मोर्दकै उहइ मनई अहइ जउन तोहरी हत्या क सइयंत्र बरे बताइके तोहार मदद किहे रहा।”

राजा बोला, “उ खम्भे पइ हामान क लटकाइ दीन्ह जाइ।”

10तउ उ पचे उहइ खम्भे पइ जेका उ मोर्दकै क बरे बनाए रहा हामान क लटकाइ दिहस। एकरे पाछे राजा किरोध करब तजि दिहस।

#### यहूदियन क मदद बरे राजा क आदेस

8 अहइ दिन राजा छयर्स यहूदी लोग क दुस्मन हामान क लगे जउन कछू रहा, उ सब महारानी एस्तेर क दइ दिहस। एस्तेर राजा क बताइ दिहस कि मोर्दकै रिस्ते मैं

हामान क मार डाएस साब्बिक “हामान क चेहरा ढाँपि दिहस।”

ओकर भाई लागत ह। एकरे पाछे मोर्दकै राजा स मिलइ आवा। 2राजा हामान स अपनी जउन अँगूठी वापस लइ लिहस रहा, ओका अपनी अगुलि स निकारिके मोर्दकै क दइ दिहस। एकरे पाछे एस्तेर मोर्दकै क हामान क सारी सम्पत्ति क अधिकारी नियुक्त कइ दिहस।

3तब एस्तेर राजा स फुन कहेस अउर उ राजा क गोड़न मैं गिरिके सेवइ लाग। उ राजा स पराथन किहस कि उ अगागी हामान क उ बुरी योजना क खतम कइ देइ जेका हामान यहूदियन क बरे सोचे रहा।

4एह पइ राजा अपने सोने क राजदण्ड क एस्तेर कइँती आगे बढ़ाएस। एस्तेर उठी अउर राजा क अगवा खड़ी होइ गइ। 5फुन एस्तेर कहेस, “मोर सुआमी! जदि तू मोका पसंद करत ह अउर इ तोहका प्रसन्न करत ह, तउ कृपा कइके मोरे बरे इ कइ द्या। जदि तोहका लगि कि इ अच्छा सुझाव अहइ। तउ एका करा। जदि तू मोह पइ खुस अहइँ तउ कृपा कइके एक ठु आदेस पत्र लिखइँ, जउन उ आदेस पत्र क रद्द कइ देइ जेका हामान राजा क राज क सबहिँ प्रान्तन मैं बसे यहूदियन क नस्त कइ बरे पठइ दिहे रहा ह।

6मई महाराज स इ पराथना एह बरे करति हउँ कि मई अपने लोगन के संग उ भयानक तबाही क घटत लखब सहन नाहीं कइ पाउब। मई आपन परिवार क हत्या क लखब सहन नाहीं कइ पाउब।”

7महाराज छयर्स महारानी एस्तेर अउर यहूदी मोर्दकै क जवाब देत भए कहे रहा, उ इ अहइ, “हामान, काहेकि यहूदियन क बिरोध मैं रहा, एह बरे ओकर सम्पत्ति मई एस्तेर क दइ दिहेउँ अउर मोरे सिपाहियन ओका फाँसी देइ क खम्भा पइ लटकाइ दिहन। 8अब तू जइसन चाहत ह राजा नाउँ स यहूदियन क मदद बरे एक ठू दूसर आग्या पत्र लिखा। फुन राजा क बिसेस अँगूठी स उ पत्र पइ मुहर लगाइ द्या। काहेकि जउन पत्र राजा कइँती स लिखा गवा ह अउर राजा क अँगूठी स मुहर दीन्ह गइ होइ अइसा कउनो राजाधिकारी पत्र रद्द नाहीं कीन्ह जाइ सकत।”

9राजा क सचिवन क फउरन बोलावा गवा। सीवान नाउँ क तीसरे महीने क तेइसवी तारीख क उ आदेस पत्र लिखा गवा। यहूदियन क बरे मोर्दकै क सबहिँ आदेसन क सचिवन लिखिके यहूदियन, मुखिया लोगन, राजपालन अउर एक सौ सताईस प्रान्तन क अधिकारियन क लगे पहोंचाइ दिहन। इ सबइ प्रान्त भारत स लइके कूस तलक फइले भए रहेन। इ सबइ आदेस पत्र हर प्रान्त क लिपि अउ भाखा मैं लिखे गए रहेन अउर हर देस क लोगन क भाखा मैं ओकर अनुवाद कीन्ह गवा रहा। यहूदियन क बरे इ सबइ आदेस ओनकी अपनी भाखा अअउर ओनकी अपनी लिपि मैं लिखे गए रहेन। 10मोर्दकै इ सबइ आदेस महाराज छयर्स कइँती स लिखे गए रहेन अउर फुन ओन पत्रन पइ उ राजा क अँगूठी स मुहर लगाइ दीन्ह रही। फुन ओन पत्रन पइ उ राजा क अँगूठी स मुहर लगाइ दीन्ह रही। फुन ओन पत्रन क ओन सँदेसवाहकन क जरिये भेजा गएन रहेन जउन तेज रफतार घोड़न पइ सावर रहेन।

11ओन पत्रन पइ राजा क इ सबइ आदेस लिखे रहेन:

यहूदियन क हरेक नगर मैं आपुस मैं एक जुट होइके

अपनी रच्छा करइ क अधिकार अहइ। ओनका अधिकार अहइ कि उ पचे कउनो भी रास्ट्र या प्रान्त क कउनो भी फउज जउन कि ओन लोगन पइ अउर ओनके मेहररुअन अउ गदेलन पइ हमला करइ सकत ह क नास कइ देइ, मार डावई अउर पूरी तहर स तबाह कइ देइ। यहूदियन क इ अधिकार भी अहइ कि उ पचे आपन दुस्मन क सम्पत्ति लूट लेई।

12जब यहूदियन क बरे अइसा कीन्ह जाइ, ओकरे बरे उदार नाउँ क बारहवें महीने क तेरहवीं तारीख क दिन निहचि क कीन्ह गवा। महाराजा छयर्स अपने सबहिं प्रान्तन में यहूदियन क अइसा करइ क अनुमति दइ दीन्ह गइ। 13इ पत्र क एक प्रति राजा क आदेस क संग हर प्रान्त में पठई जाब रही। हर प्रान्त में इ एक नेम बन गवा। राज्ज में रहइवाले हर जाति क लोगन क बीच एकर प्रचार कीन्ह गवा। उ पचे अइसा एह बरे किहन ताकि यहूदी उ बिसेस दिन क बरे तइयार होइ जाई जउन दिन उ पचे अपने दुस्मनन स बदला लेइ सकई। 14राजा क घोड़न पइ सवार संदेस वाहक हाली स बाहेर निकरि गएन। ओनका राजा आग्या दिहे रहा कि हाली करई। इ आग्या सूसन क महल प्रान्त में भी घोसना कीन्ह गएन।

15फुन मोर्दकै राजा क लगे स चला गवा। मोर्दकै राजा स मिले ओढ़नन क धारण किहे भए रहा। ओकर ओढ़नन नीले अउ सफेद रंग क रहेन। उ ऐक ठु लम्बा सोने क मुकुट पहिर रखे रहा। बढिया सूत क बना बैंगनी रंग क चोगा भी ओकरे लगे रहा। लोग बहोत खुस रहेन। 16यहूदियन क बरे इ बिसेस खुसी क दिन रहा। इ आनन्द, खुसी अउर बड़े सम्मान क दिन रहा।

17जहाँ कहुँ भी कउनो प्रान्त या कउनो भी नगर में राजा क इ आदेस- पत्र पहाँचा, यहूदियन में आनन्द अउ खुसी क लहर दउइ गइ। यहूदी भोज देत रहेन अउर उत्सव मनावत रहेन अउर दूसर बहोत स सामान्य लोग यहूदी बन गएन। काहेकि उ पचे यहूदियन स बहोत डरा करत रहेन, इहइ बरे उ पचे अइसा किहन।

### यहूदियन क बिनइ

9 लोगन क अदार नाउँ क बारहवें महीने क तेरह तारीख क राजा क आग्या क पूरा करब रहा। यहूदी क दुस्मनन क आसा रहने कि उहइ दिना उ पचन्क यहूदी क हराइ सकतेन। किन्तु अब सब कछू उलटा होइ चुकी रही अब यहूदी अपने ओन दुस्मनन क हराब्या जउन ओसे घिना करत रहेन। 2महाराजा छयर्स क सबहिं प्रान्तन क नगरन में यहूदी आपुस में उ पचन्क पइ हमला करइ बरे इकट्ठा भएन जउन ओनका नस्ट करइ चाहत रहा। इ तरह ओनके बिरोध में कउनो भी जियाद सक्तिसाली नाहीं रहा काहेकि लोग यहूदी लोगन स डेराइ लागेन। 3प्रान्तन क सबहिं हाकिम, मुखिया, राज्जपाल अउर राजा क प्रबन्ध अधिकारी यहूदियन क मदद करइ लागेन। उ पचे सबहि अधिकारी यहूदियन क मदद एह बरे किया करत रहेन कि उ

पचे मोर्दकै स डेरात रहेन। 4राजा क महल में मोर्दकै एक बहोत महत्वपूर्ण मनई बन गवा। सबहिं प्रान्तन में हर कउनो ओकर नाउँ जानत रहा अउर जानत रहा कि उ केतना महत्वपूर्ण अहइ। तउ मोर्दकै जियादा सक्तिसाली होत चला गवा।

5यहूदियन अपने सबहिं दुस्मनन क पराजित कइ दिहन। अपने दुस्मनन क मारइ अउ नस्ट करइ क बरे उ पचे तरवानन क प्रयोग किया करत रहेन। जउन लोग यहूदियन स घिना किया करत रहेन, ओनके संग यहूदी जइसा चाहतेन, वइसा बेउहार करतेन। 6सूसन क राजधानी नगरी में यहूदियन पाँच सौ लोगन क मारिके नस्ट कइ दिहन। 7यहूदियन जउन लोगन क हत्या किहे रहेन ओनमें इ सबइ लोग भी सामिल रहेन: पर्सन्दाता, दल्पोन, अस्पाता, 8पोराता, अदल्या, अरीदाता, 9पर्सता, अरीसै, अरीदै अउर वैजाता। 10इ सबइ दस लोग हामान क पूत रहेन। हम्मदाता क पूत हामान यहूदियन क बैरी रहा। यहूदियन ओन सबहिं मनसेधुअन क मार तउ दिहेन किन्तु उ पचे ओनकर सम्पत्ति नाहीं लिहन।

11जउन दिन राजा सुनेन कि सूसन क महल प्रान्त में बहोत स लोग मारे गएन ह। 12तउ महारानी एस्तेर स कहेस, “सूसन नगर में यहूदियन पाँच सौ मनइयन क मार डाएन ह तथा उ पचे सूसन म हामान क दस पूतन क भी हत्या कइ दिहन ह। राजा क दूसर प्रान्तन में का होत अहइ? अब मोका बतवा तू अउर का करावइ चाहति अहा? जउन कहा मई ओका पूरा कइ देब।”

13एस्तेर कहेस, “जदि अइसा करइ क बरे महाराज खुस अहई तउ यहूदी लोगन जउन सूसन में अहइ ओका कल्ह फुन स सूसा में राजा क आग्या पूरी करइ दीन्ह जाइ, अउर हामान क दसहुँ पूतन क फाँसी क खम्भे पइ लटकाइ दीन्ह जाइ।”

14तउ राजा इ आदेस दइ दिहस कि सूसन में भियान भी राजा क इ आदेस लागु रहइ अउर उ पचे हामान क दसहु पूतन क फाँसी पइ लटकाइ दिहन। 15आदार महीने क चौदहवीं तारीख क जउन यहूदी सूसन क महल प्रान्त में अहइ एक संग बटुरेन। फुन उ पचे हुवाँ तीन सौ मनइयन क मउत क घाट उतार दिहन किन्तु उ पचे तीन सौ लोगन क सम्पत्ति क नाहीं लिहन।

16अदार क तेरहवें दिन दूसर प्रान्तन में रहइवाले दूसर यहूदी भी आपुस में बटुरेन। उ पचे एह बरे बटुरेन कि अपने बचाव क लिए उ पचे पर्याप्त बलसाली होइ जाई अउर इ तरह उ पचे अपने दुस्मनन स छुटकारा पाइ लिहन। यहूदी लोग अपने पचहतर हजार दुस्मनन क मउत क घाट उतार दिहन। किन्तु उ पचे जउने दुस्मनन क हत्या किहे रहेन, ओनकर कउनो भी वस्तु क नाहीं लिहेन। 17इ अदार नाउँ क महीने क तेरहवीं तारीख क भवा अउर फुन चौदहवीं तारीख क यहूदियन बिस्त्राम किहन। यहूदियन उ दिन क एक ठु खुसी भरे दिन क रुप में बनाइ दिहन।

### पूरीम क लौहार

18किन्तु यहूदी लोग जउन सूसन में रहा अदार महीने क तेरहवीं अउर चौदही तारीख में आपुस में बटुरेन, तउ

पन्द्रहवीं तारीख में उ पचे बिस्त्राम किहन। उ पचे पन्द्रहवीं तारीख क फुन एक खुसी भरे छुट्टी क दिन बनाइ दिहन। 19इहइ कारण उ गाँव क प्रदेस क नान्ह नान्ह गाँवन में रहइवाले यहूदियन चौदहवीं तारीख क खुसियन भरी छुट्टी क रूप में रखेन। उ दिन उ पचे आपुस में एक दूसर क भोज दिहन।

20जउन कछू घटा रहा, ओकर हर बात क मोर्दैके पत्र में लिख लिहस अउर फुन पत्रन क महाराजा छयर्स क सबहिं प्रान्तन में बसे सबहिं यहूदी लोगन क पठइ दिहस। दूर-पास सब कहूँ उ पत्रन पठएस। 21मोर्दैके यहूदियन क इ बतावइ बरे अइसा किहस कि उ पचे हर साल अदार महीने क चौदहवीं अउर पन्द्रहवीं तारीख क पूरिम क उत्सव मनाया करई। 22यहूदी लोग एँ दिनन क पर्व क रूप में एह बरे माने रहेन कि ओनहीं दिनन यहूदियन अपने दुस्मनन स छुटकारा पाए रहेन। ओनका उ महीने क एह बरे भी मानब रहा कि इहइ उ महीने रहा जब ओनकर ओनके आनन्द में बदल गवा रहा। उहइ इ महीना रहा जब ओनकर रोउब धोउब एक ठु उत्सव क दिन क रूप में बदल गवा रहा। उ ओन लोगन स कहेस कि य पचे ओन दिनन क उत्सव क रूप में मनावई। इ समइ एक अइसा समइ होइ जब लोग आपुस में एक दूसरे क उत्तम भोजन क उपहार पठइ तथा गरीब लोगन क भी उपहार देई।

23इ तरह मोर्दैके यहूदियन क लिखे रहा, उ पचे ओका मानइ क तइयार होइ गएन। उ पचे इ बात पइ सहमत होइ गएन कि उ पचे जउन उत्सव क आरम्भ किहन ह, उ पचे ओका मनावत रहिहीं।

24काहेकि अगागी हम्मदाता क पूत हामान यहूदी लोगन क दुस्मन रहा। उ पचे यहूदी लोगन क खिलाफ ओनका नस्ट करइ बरे बुरा जोजोना बनाए रहा। उ पचे ओनका बर्बाद कइ डावइ बरे दिन चुनइ वास्ते पास लोकाए रहा। ओन दिन पौसा क “पुर” कहा जात रहा। इहइ बरे इ उत्सव क नाउँ “पूरीम” रखा गवा। 25किन्तु राजा क लगे गइ अउ उ ओनसे बातचीत किहस। इहइ बरे राजा क नवे आदेस जारी कइ दिहे गएन। यहूदियन क खिलाप हामान जउन सडयंत्र रचे रहा, ओका रोकइ क बरे राजा अपने पत्र जारी किहस। राजा ओन ही बुरी बातन क हामान अउ ओकरे परिवार क संग घटाइ दिहस। ओन आदेसन में कहा गवा रहा कि हामान अउ ओकर पूतन क फाँसी पइ लटकाइ दीन्ह जाइ।

26-27इ समइ पास “पूरीम” कहलाएन। एह बरे इ ल्यौहार “पूरीम” कहलाएन। यहूदी लोग हर बरिस इन दुइ दिनन क उत्सव क रूप में मनावइ क सुरूआत करइ क निहचइ

किहन। उ पचे इ एह बरे किहन ताकि अपने संग होत भए जउन बातन उ पचे लखे रहेन, ओनका याद रखइ में ओनका मदद मिलइ। यहूदियन हर साल सही समइ पइ एन दिनन क मनावइ क जिम्मा आपन पइ लिहा। उ पचे इ भी तय किहेस कि ओकर सन्तानन अउर दूसर लोगन जउन ओकरे संग मिले, मोर्दैके क निर्देस क अनुसार जउन उ अपने आदेस पत्र में दिहे रहा उहइ रीति अउ उहइ समइ पइ मनावब। 28इ दुई दिनन पीढ़ी दर पीढ़ी अउर हर परिवार क याद रखब अउर मनावब। एनका हर प्रान्त अउ हर नगर में निहचइ पूर्वक क मनवा जाइ चाही। यहूदी लोग क एनका मनावब कबहुँ नाहीं तजइ चाही। यहूदी लोगन क सन्तानन क चाही कि उ पचे पूरिम क एन दुइ दिनन क मनावब कबहुँ फेल नाही होइ चाही।

29महारानी एस्तेर अबीहैल क बिटिया अउर यहूदी मोर्दैके इ दूसर पत्र पूरिम क बारे में लिखेस। उ पत्र फुरइ रहा, एँका साबित करइ बरे उ पचे एका राजा क सम्पूर्ण अधिकार क साथ लिखेन। 30तउ महाराजा छयर्स क राज क एक सौ सताईस प्रान्तन में सवाहिं यहूदियन क लगे मोर्दैके पत्र पठएस। मोर्दैके सान्ति अउ सच्चाई क एक सँदेसा लिखेस। 31मोर्दैके पूरिम क लोगन क उत्सव क सुरू करइ क बारे में लिखेस। एँ दिनन क मोर्दैके अउर एस्तेर दुआरा अपने बरे अउर अपनी सन्तानन बरे उपवास अउर विलाप क बारे में ठीक ओकरे नियुक्त कीन्ह समइ पइ ही मनाववा जाब रहा। 32एस्तेर क पत्र पूरिम क बिसय में एन नेमन क स्थापना किहन अउर पूरिम एन नेमन क किताबन में लिख दीन्ह गवा।

### मोर्दैके क सम्मान

**10** महाराजा छयर्स लोगन पइ कर लगाएस। राज क सबहिं लोगन हिआँ तलक कि सागर तट क सुदूर नगरन क भी कर चुकावइ पडत रहेन। 2राजा छयर्स जउन महान कार्य अपनी सक्ती अउ सामरथ स किहे रहेन उ सबइ “मादै अउर फारस क राजा लोगन क इतिहास” क किताबे में लिखे अहई। ओन ‘इतिहास क किताबन’ में मोर्दैके जउन कछू किहे रहा, उ सब कछू भी लिखा अहइ। राजा मोर्दैके क एक महान मनई बनाइ दिहस। 3महाराजा छयर्स क हिआँ यहूदी मोर्दैके महत्व की दृष्टि स दूसरी जगह पइ रहा। मोर्दैके यहूदियन में बहोत महत्वपूर्ण मनई रहा। अउर ओकर साथी यहूदी ओकर बहोत आदर करत रहेन। उ पचे मोर्दैके क आदर एह बरे करत रहेन कि उ अपने लोगन क भले क बरे काम किहे रहा। मोर्दैके सबहिं यहूदियन क कल्याण क बातन किया करत रहा।



# License Agreement for Bible Texts

World Bible Translation Center

Last Updated: September 21, 2006

Copyright © 2006 by World Bible Translation Center

All rights reserved.

## These Scriptures:

- Are copyrighted by World Bible Translation Center.
- Are not public domain.
- May not be altered or modified in any form.
- May not be sold or offered for sale in any form.
- May not be used for commercial purposes (including, but not limited to, use in advertising or Web banners used for the purpose of selling online ad space).
- May be distributed without modification in electronic form for non-commercial use. However, they may not be hosted on any kind of server (including a Web or ftp server) without written permission. A copy of this license (without modification) must also be included.
- May be quoted for any purpose, up to 1,000 verses, without written permission. However, the extent of quotation must not comprise a complete book nor should it amount to more than 50% of the work in which it is quoted. A copyright notice must appear on the title or copyright page using this pattern: "Taken from the HOLY BIBLE: EASY-TO-READ VERSION™ © 2006 by World Bible Translation Center, Inc. and used by permission." If the text quoted is from one of WBTC's non-English versions, the printed title of the actual text quoted will be substituted for "HOLY BIBLE: EASY-TO-READ VERSION™." The copyright notice must appear in English or be translated into another language. When quotations from WBTC's text are used in non-saleable media, such as church bulletins, orders of service, posters, transparencies or similar media, a complete copyright notice is not required, but the initials of the version (such as "ERV" for the Easy-to-Read Version™ in English) must appear at the end of each quotation.

Any use of these Scriptures other than those listed above is prohibited. For additional rights and permission for usage, such as the use of WBTC's text on a Web site, or for clarification of any of the above, please contact World Bible Translation Center in writing or by email at [distribution@wbtc.com](mailto:distribution@wbtc.com).

World Bible Translation Center

P.O. Box 820648

Fort Worth, Texas 76182, USA

Telephone: 1-817-595-1664

Toll-Free in US: 1-888-54-BIBLE

E-mail: [info@wbtc.com](mailto:info@wbtc.com)

**WBTC's web site** – World Bible Translation Center's web site: <http://www.wbtc.org>

**Order online** – To order a copy of our texts online, go to: <http://www.wbtc.org>

**Current license agreement** – This license is subject to change without notice. The current license can be found at: <http://www.wbtc.org/downloads/biblelicense.htm>

**Trouble viewing this file** – If the text in this document does not display correctly, use Adobe Acrobat Reader 5.0 or higher. Download Adobe Acrobat Reader from: <http://www.adobe.com/products/acrobat/readstep2.html>

**Viewing Chinese or Korean PDFs** – To view the Chinese or Korean PDFs, it may be necessary to download the Chinese Simplified or Korean font pack from Adobe. Download the font packs from: <http://www.adobe.com/products/acrobat/acrrasianfontpack.html>